

# LA PATRIE DAL FRIÛL

SFUEI MENSÎL INDIPENDENT

Direzion e Aministrazion - Udine - via del Cottonificio 129

Tassa pagata / Taxe perçue Udine Italy - mensile / mensîl spedizion in abonament postâl Poste italiane s.p.a.

## LINT AUTONOMISTE



### Daûr de marche “Io sono FVG” si plate il pinsîr unic

Dree Valcic

❖❖ Us sarà dal sigûr sucedût in chest periodi, lant ator pes vuestris citâts, di notâ cualchi mega cartelon pubblicitari cun scrit “Io sono Friuli Venezia Giulia”. Une campagne pubblicitarie che si veve za viodût su lis pagjinis dai cuotidians. Al è difcil di capi cui e ce che a rapresentin chês musis discognossudis, che si fasin inmò plui anonimis inte lôr gjeneralitât, tant che a podaressin jessi piemontês, lombarts, romagnûi e vie indenant. Se po dopo la finalitât e je chê di piturâ un ritrat tipic de nestre int, alore ancjemò piês. Di fat, cui mai saressial in stât di riassumi intune uniche fisionomie lis diversis carateristichis somaticis di cheste Region? Il risultât di chest ritrat “efevugjin” al sarès une specie di mascare grotescje: Frankenstein.

❖❖ Ma pal assessôr competent, e Promoturismo Fvg, che al è il so “braç armât”, si trate de plui grande operazion mai fate de Region par fâ cognossi lis ecelencis di chenti midiant, apont, de marche “Io sono FVG”.

❖❖ No vûl stufâus cun details tecnicos suntune campagne promozionâl, refudade di ducj i professionisj dal setôr, ma domandâus, invezit, parcè che si ledi indenant par cheste strade cun arrogance e supierbie, parcè che si insist, cun ducj i mieçs a disposizion, a imponi chest FVG che al à di aparî e di paronâ su ogni iniziative de Region.

❖❖ Al è un martielâ mediatic continui, indurant. No tu sês plui furlan, sloven, todesc, talian: tu sês dome FVG. Tu sês un “logo”.

❖❖ Secui di storie, di culture,

(al va indenant a pagj. 2) ►



## EDITORIÂL

**L**is classifichis no bastin a descrivi dute la cualitât di ce che si insegne intun percors di studi, ma savê che la Universitât dal Friûl e je tierce in Italie inte valutazion dal Censis dai 16 ateneus publics di dimension medie (chei che a van di 10 a 20 mil students iscripts), e je une sodisfazion par ducj. La graduatorie anuâl, che di vincj agns e misure in maniere comparade lis istituzions academichis, e viôt miorâ la posizion di chê furlane che l'an passât e jere seste e chest an si è plaçade daûr dome des Universitâts di Trent (prime) e Siene (seconde). Aes Olimpiadis e sarès une medaie di bronç (come chês di Mara Navarria e Mirko Zanni, brâfs!): cence dubi un biel travuart.

◆ La reson di chest sucès si spieghè cui aspjets valutâts: e chel de comunicazion e dai servizis digjitâi che a vegnin ufierts ae comunitât dai docents e dai students al è il miôr in dute Italie. Si cjatin invezit in tierce posizion pai servizis, e in cuarthe pal tas di ocupazion dai laureâts: plui bas il pês des borsis di studi e dai contribûts, che nus place al otâf puest.

## LA UNIVERSITÂT CHE IL CENSIS AL PREMIE E CHE LA RAI E DISMENTEE

Walter Tomada

◆ Content il retôr Roberto Pinton che al pant «grande sodisfazion» par chest risultât, soregut intun an di pandemie che al à condizionade la didatiche in maniere penze. L'Ateneu al è stât bon di frontâ chescj ostacui e cheste classifiche lu mostre clâr a ducj. O cuasi. Pecjât di fat che la Rai si sedi “dismenteade” di cheste gnove, lant invezit a valorizâ in maniere pluitost discutibile il cuart puest (ven a stâi la medaie di len) di chê di Triest: biel risultât anje

chel, ma parcè il len valial plui dal bronç? Parcè il rapuart dal Censis isal stât comunicât de sede regionâl de Rai come se Udine nol esistès?

◆ Invezit l'Ateneu dal Friûl al esist, e in cierts cantins al lavore une vore ben, resonant anje su temis che a tocjin la specialitât des Regjons autonomis: par chest e je stade firmade tes setemanis passadis une Convenzion quadri jenfri Universitât di Udine, Regjons Friûl-Vignesie Julie e Val di Aoste

e Provinciis autonomis di Trent e Bolzan. Chest par lâ a elaborâ imprescj e strategiis comunis di studi e di ricercje sul “regionalisim asimetric” e su lis sôs prospetivis tal avignî.

◆ L'Ateneu al à za anunziât che ai 15 di Novembar si tignarà la cerimonie di inaugurazion dal an academic che e varà tant che ospit di gale il prefet Franco Gabrielli, sotsegretari di Stât ae Presidenza dal Consei, che i vignarà dade la laurea “honoris causa”. Une presince che e mostre il bon nivel di considerazion istituzionâl che la Universitât dal Friûl e à, in grazie de cualitât de sò didatiche e dal sò jessi espression di une tiere e di un popul che le à volude cun fuarce. E che a pretindaressin che i sfuarçs di cui che i lavore dentri a fossin rispjetâts, tacant dal contâ lis robis come che a son. Su chest il servizi public, paiât soregut cui bêçs dai furlans, al è in debit viers dal Friûl: cuissà se o rivarìn mai a dreçâ il scuilibri che in cheste Region “scuilibrade” al esist anje a nivel informatif? Une di, forsit, dongje des tantis maraveis di Triest, si cjatarà spazi anje par contâ di ce che al sucèt di ca dal Timau. Ma al sarà simpri masse tart... ■

❖ a pagjine 3

### SINDIC JO MAME

Viaç ae scuvierte di cui che al vuide i Comuns furlans di Dree Venier

❖ a pagjine 5 e 12

### PATRIARCJIS FÛR DAL ORDENARI E IL FRIÛL VIODÛT DAI SCRITÔRS

di Diego Navarria e Agnul Floramo

❖ a pagjine 6

### LIS OLIMPIADIS CUI VOI DAI FURLANS DI TOKYO

Interviste a Ottaviano Cristofoli di Walter Tomada

❖ a pagjine 10

### CARNIARMONIE, 30 AGNS DI SUCÈS

Une rassegne storiche ma simpri plui zovine di Alessio Screm



## LINT AUTONOMISTE

(al va indenant de prime pagjine)

Daûr de marche  
"Io sono FVG"  
si plate  
il pinsîr unic

Dree Valcic

di lenghe e di usancis scanceladis di une sigle! Un mût par netâ vie la diversitât, un colp sec aes motivacions de nestre specialitât, une piconade aes fondis de autonomie, che ancje propit su la presince des diversitâts e fonde la sô configurazion istituzionâl. Une operazion planificade e scientifiche di etnocidi. No vin di vê pôre di pronunziâ, di scrivi cheste peraule orende, che i plâs tant a ogni regjim autoritari. No vin di vê pôre tal declarâ che si trate di un prin pas bande il pinsîr unic: al varâ di jessi cussî parcè che o comandin nô. Che dut chest si fondi su la falsietât o su la ignorance, nol impuarte: e je la nestre veretât.

\*\*\* E cui che no i sta? Ce mai saraial di chei che a laran indenant a di che "Io sono FVG" e je une bufule grandonone?

\*\*\* Atenzion: il pinsîr unic nol previôt compromès o refûts. La storie lu à za dimostrât in maniere tragjiche. ■

## INT DI CJARGNE

A Plan di Cuel di Rualp  
une gnove fatorie didatiche

Marta Vezzi

**A**Rualp, piçule frazion dal Comun di Darte, ai 4 di Jugn e je stade screade la Fatorie didatiche e agriturisim "Plan di Cuel", e pai fradis Bombardier e je scomençade une gnove aventure.

◆ "Il prin mès al è stât impegnatîf – e dis Rosanna – parcè che o vin vût di capî cemût che e funzionave. Jo no ven di une realtât di ristorazion e duncje o ai scugnût imparâ robis che no savevi. O soi simpri stade une imprenditore edil. O soi contente parcè che o ai colaboradôrs zovins e dal puest, e o soi convinte che cheste e sedi une esperience par cognossi di dongje cheste realtât e par innamorâsi di ce che o vin achî di nô. Il cogo al à 32 agns, il rest dai colaboradôrs tra i 17-18 agns."

◆ Tal agriturisim si puedin mangjâ prodots tipics cjargnei, in particolar i cjarsons fats di Rosanna cu la recipe di sô none, polente e frico, strucul di mêi di lôr produzion e strucul di scuete fate in Cason di Lance, e v.i.

◆ Dongje e je ancje une officine e un magazen pes bicicletis eletrichis che a vegnin dadis in afit. "Cun di plui – e conte Rosanna – , culûn



al puest sostâ e al à la pussibilitât di fâsi una doce, in maniere di cjatâ un pocje di pàs e di trancuilitât dopo di un zîr fadiôs... Nô no sin tal plan! In plui, o vin creât diviers percors par valorizâ chest teritori: fin te Pléf di Sant Martin, a Cjaserualas – indulâ che al è il sît dai pagans –, in malghe Val Medan, in Cason di Lance, che di chest an o vin in gjestion nô e indulâ che si puedin cjatâ ancje i nestris prodots di malghe.

◆ Di trê agns o vin la certificazion ICEA pai nestris prodots di ort biologjics. Se tu vûs vignî, ti din la pussibilitât di sielziti di bessôl la verdure

dai orts (chest an al è dut indaûr par colpe de stagjon matarane). Se un al vûl, al puest lavâsi la verdure e mangjâ sul puest, o se no le puarte a cjase. Dopo, o vin la fatorie didatiche che e partirà fra un pòc e che e sarâ vierte aes scuelis e aes fameis, che cussî a podaran passâ un pòc di timp ca di nô, mangjâ i nestris prodots e – parcè no – fâ cualchi biele cjaminade.

◆ O vin cirût di puartâ un pocje di armonie e di funzionalitât par fâ tornâ a vivi chest pais indulâ che nol jere plui nuie. Dopo il Covid, l'unic Cral che al jere al è fer (no sai se al tornarà a vierzi) e duncje e jere bisugne di vê

un puest indulâ che la int si podès cjatâ par stâ in compagnie, bevi alc o mangjâ un gjelât. A son personis che a vivin di bessolis a cjase e che a vegnin sù achî a mangjâ, cussî a passin chel moment insiem cun nô. Il nestri ambient nol è sofisticât, anzi al è un grum semplic e familiar. O vin dât fuarce ae nestre ativitât za inviade par dâ un sburt al nestri pais di mont. O soi simpri stade convinte che al fos just fâ alc achî. O ai simpri vivût ca sù e insiem ai miei fradis Laura e Loris o vin decidût di invistî lis nestris ativitâts economicis (edil, boschive, bed and breakfast e ristorazion) simpri tal comun di Darte, parcè che o volin ben al nestri teritori. Unic probleme: o vin il soreli, o vin aiar bon, bieî paisaçs, ma pocjissime rêt internet."

◆ Ma chel, intun lûc indulâ che si respire la pàs e la trancuilitât, vadî che nol è nancje tant un probleme! Cui che la vûl savê alc di plui al pues cjalâ sul sît <https://www.fattoriadidatticaplandicuel.com/#la-fattoria-didattica>, o te pagjine facebook <https://www.facebook.com/Agriturismo-Plan-di-Cuel-105484405109322>. ■

LA PATRIE  
DAL FRIÛL

Difint la tô lenghe

Difint la tô tiere

Difint la tô Patrie dal Friûl

## ABONITI!

ABONAMENT PAR UN AN  
(11 numars di Fevrâr a Dicembar)

25,00 euros

(sedi pe Italie che pal forest)

Il gjornâl al rivarà a cjase par pueste

Si pues abonâsi in plui manieris:

On line midiant BONIFIC cun


IT35 6030 6963 8891 0000 0002 090

metint te causâl: "Abonament pe Patrie"

Cun BOLETIN POSTÂL sul Cont corint postâl n. 12052338

intestât a «La Patrie dal Friûl»

via del Cotonificio, 129 - 33100 Udine.



SUL BOLETIN O SUL BONIFIC VISITI DI SCRIVI DULÀ SPEDÌ IL GJORNÂL

## INT DI CJARGNE

Giulia Serafin,  
a Dimpeç la decorazion  
e devente art

Marta Vezzi

**G**iulia Serafin e je nassude e crescude a Dimpeç. E à frecuentât il liceu classic e po dopo la scuele dai mosaiciscj di Spilimberc. Tal 2010, a 23 agns, e à decidût di vierzi il so laboratori di decorazion e piture e e conte "o ai vude cheste pussibilitât: o ai vierte la partide I.V.Z. e ae fin e je lade ben! I miei gjenitôrs a vevin un garage in place a Dimpeç intun pont avonde centrâl; mi àn dât une man, metût in dret, cambiât i sieraments e fat un negoziut. Nol è propit tant in veste e al tocje jentrâ in place, e in bande de glesie si lu cjate, ma istès al è intun biel puest. Jo o ai simpri vût avonde lavôr parcè che, jessint la uniche in zone che e fâs chest, no ai concorence. Ciert, o soi bessole e no pues cjapâ sù tancj lavôrs, ma ai rivât adore di fâmi une clientele avonde ampie. Mi à simpri plasût disegná e lavorâ cu la ceramiche. O ai simpri cirût di fâ un pòc di dut, ancje parcè che dome mosaic al jere masse difil e costôs... No podevi pensâ di lavorâ dome di chel intun paisut come Dimpeç. Alore

o ai decidût di fâ alc di dut: robotis piçulis, taçutis, articui di regâl par contentâ un pòc ducj. I prodots che o fâs a son soredu di ceramiche, però o pituri ancje su pe tele, sul len, o fâs murales, o fâs tantis bombonieris, regâi personalizâts (soredu cumò che la int e sa, e ven a ordenâ articui cul non, cu la dediche e duncje o disegni un pòc di dut, in particolar cul gno stîl e cence copiâ nissun: o fâs rosis di mont e sbilfs, ma ancje animâi e personaçs dai cartons animâts. O curi cetant la mè piçule vetrine e le cambiâ daûr de stagjon; e je piçule ma e da un grum tal voli, di fat tante int si ferme a viodile!"

◆ Un dai ultims lavôr impegnatîfs che Giulia e à fat al è di trê setemanis fa, e dis "o ai piturât cuasi dut l'interni dal ripâr Tita Piaç che al è sul Pura. Al è stât un lavôr avonde grant. Cognossint il gno stîl, mi vevin dade avonde libertât, e cussî o ai lassât cori la mè creativitât."

◆ Giulia e je sodisfate de sô sielte,

ancje parcè che "in Cjargne l'artesanât al è une vore preseât; la int che e ven chi di me e vûl fâ un regalut e e pretint che al seti scrit che al è stât fat a man a Dimpeç, in Cjargne. E par me chest al è tant orgoi. Jo o ai tant gust soredu cuant che mi disin "ma âstu scrit che al è fat a man a Dimpeç?": nol interesse tant il dissen davanti, ma pitost che daûr al seti scrit chest. Ti da sodisfazion! Mi stimi fortunade e contente di vê une ativitât come la mè. O soi partide par cás e mi è lade ben. Par doi agns o jeri ancje a Tumieç e considerât che al jere difil gjesti doi negoziis (ancje a nivel di coscj), o ai decidût di mantignî dome Dimpeç. O ai ancje la fortune di podê lâ a lavorâ a pît, cul lavôr a pôcs metris di cjase. Mi sint propit fortunade: vè vût il garage tal pont just e strategic e i miei gjenitôrs che mi àn dât cuarde... une rie di coincidencis fortunadis. Fin di piçule o vevi il sium di piturâ e o soi rivade insom."

◆ Giulia tal timp libar si dediche al teatri e e zonte "O soi contente ancje di vê fat il classic: mi à simpri plasût scrivi storiis e chest a mi à judât. Mi plâs scrivi teatri. O vin la compagnie teatral achî a Dimpeç metode sù insiem a un gno amî e tra un pòc o sperî di començâ."

◆ Par cui che al vûl curiosâ virtualmentri, al pues lâ su la pagjine facebook ArtiGiulia <https://www.facebook.com/profi-le.php?id=100057659401503>. ■



SINDIC JO MAME

# «Il furlan al è une risorse preziose di doprâ in ogni ambit de vite quotidiane»

## Interviste a Lucia Brunettin, sindiche di Cordovât

Dree Venier



LUCIA BRUNETTIN

**A** Cordovât o jeri stât l'Istât passât intant che o jeri a torzeon a visitâ il Friûl Ocidentâl. Pûr jessint un país sul confin cul Venet, o vevi vualmât un grant numar di bandieris de Patrie cu la acule di Bertrant. In sume, o jeri curios di intervistâ la sindiche Lucia Brunettin par viodi ce che al è sot di cheste floridure zale e blu sui barcons dal so país. Nol da di maravee che chest Comun al sedi dentri de ACLiF- Assemblee de Comunitât Linguistiche Furlane...

**Sindic (o sindiche?), cuant sêso jentrâts te ACLiF?**

Che mi clami "sindic": par me al è un tiermin neutri, che nol va a identificâ il gjenar masculin o feminin, ma la figure istituzionâl. O sin jentrâts intal 2017 cuntune deliberazion cun unanimitât di consens di bande de sentade consiliâr.

**Parcè sêso jentrâts e cun ce convinzion (di là dal vôt unanim)?**

Il Comun al è dentri intal ambit teritoriâl di tutele de lenghe furlane e o crodin inte impuartance de valorizazion de lenghe furlane; parcè che il Friûl-Vignesie Julie al è une regjon a statût speciâl e une des sôs specialitâts al è propit il furlan che al va viodût tant che une risorse preziose. Cun di plui, pûr jessint zone di frontiere cul Venet, cun influencis che a vegnin massime dal dialet venet, la nestre volontât ferme e je chê di favorî un ampliament de cognossince dal furlan ancje intai comuns dongje de aree venite, che a àn une comunitât furlanofone.

In bande de lenghe furlane, al zuie dal sigûr un rûl fundamentâl ancje l'aspiet socioculturâl dal nestri jessi furlans, colegât ai costums, rituâi, tradizions, sens de storie, cussience, volontât e sens di appartignince. E po la laboriositât, e la fuarce che e ven dal jessi un popul di frontiere e de fede cristiane che la int e à simpri pandût. In dut chest, nô si ricognossin ad implen e dal dut.

**In cheste otiche ancje culturâl, ce pês aial jessi un Comun di confin?**

Cemût che o ai dit prime, lu sintin tant che une risorse preziose e nus permet di viodi lis robis intune otiche di prin plan, ancje a pet de fuarte influence venite tes nestris zonis.

**E a proposit di identitât, il pordenonês isal Friûl? Cualchidun lu met in dubi...**

Jo o soi di Pordenon e no sai il furlan: i miei no lu fevelavin e duncje no ai vût la ocasion di imparâlu, ma mi sint e mi soi simpri sintude furlane. Il pordenonês al è Friûl Ocidentâl, pont. Cence nissun dubi.

**Par promovi la nestre lenghe, voaltris ce iniziativis vês fat o vês in cantîr?**

Chest an, cundut dal probleme COVID che al à di fat

blocât ogni gjenar di iniziative, tal mês Mai, vie pe setemane de culture de Societât Filologjiche Furlane, o vin vût la presentazion dal libri *Il gjalut postin*. Dopo, una robe che us toçje: la presentazion dal vuestri mensil *La Patrie dal Friûl*, vinar ai 27 di Avost intal ambit dai incuintris *La Patrie sot dal tei* che al memoree lis tradizions des riunions vicinâls antighis dai nestris país sot di un tei. Propit a Cordovât al è un esemplâr secolâr di cheste specie arborie fuarte. A Otubar o vin chê di presentâ la mostre itinerante de Arlef *Furlan Lenghe di Europe* intal ambit des fiestis pe Madone dal Rosari. O ricuardi ancje la divulgazion capilâr dai depliants cul fumet *Free & Ulli e lis bestie* prodot de Arlef cun riferiment ae emergjence sanitarie covid-19. La distribuzion e je stade fate tai centris estîfs, ae utence de biblioteche civiche comunâl e aes scuclis dal teritori.

**Viodude la sô convinzion tal prudelâ il furlan, i domandi: ce si podressial fâ di plui?**

O disarès che si varès di favorî une cognossince plui profonde de lenghe furlane, par che no si pierdi, stant che plui al passe il timp e plui o pierdin chês

memoriis storichis dai nestris nonos o barbis che lu savevin fevelâ tant ben e che a podevin lassâlu aes gjenerazions futuris. La politiche regionâl si à di impegnâ di plui intal individuâ e programâ iniziativis par un ricognossiment plui marcjât de impuartance di cheste nestre lenghe romanze. Par tant che e sedi za ricognossude uficialmentri, al va fat una vore di plui par promovile, valorizâl e soredut tutelâl. Duncje, al è ben favorî il bilinguism inte toponomastiche e inte segnaletiche stradâl, sostignint ancje il so ûs intes amministrazioni publichis locals e in ogni ambit de vite quotidiane.

## Cui che e je la sindiche di Cordovât

**L**ucia Brunettin e je nassude a Pordenon tal 1965. E je educadore e consulente familiâr. Laureade in sciencis e tecnicis psicologjichis, e je sindiche di Cordovât dal 2019. E je stade vice sindiche tes dôs amministrazioni di prime. ■

**E ce podressie fâ di plui la Regjon?**

La Regjon e scugnarès judâ i piçui comuns tant che il nestri, che par adeguâ la segnaletiche i coventin risorsis consistentis che no si rivin a cjatâ fûr cun fonts propriis. La istituzion regionâl e varès di jessi plui comunicative in merit ae oportunitâts contributivis che a son pe promozion e pe valorizazion de lenghe furlane: o calcoli che cheste comunicazion cumò e sedi un pôc carente. Cun di plui, agevolâ la assunzion di un bon numar di insegnants di lenghe furlane, che vuê a mancjin, e, simpri tal rispjet des normis, valutâ di ingaiâ chei che a son za in cuissance, che, se si aprofondis cheste tematiche in mût plui incisif, e sarès una buine base di partence par una difusion capilâr in ambit scolastic. La Regjon e varès di finanziâ ancje la realizazion di laboratoris, cors e ativitâts no dome pai zovins ma ancje pai adults e che a vadin soredut inte direzion di cjàpâ dentri i comuns limitrofs de aree venite intune condivizion di progjetualitât difusive dal furlan su scjale plui largje.

**La ACLiF aie dome un rûl culturâl o puedie vè ancje**

**un rûl politic par balançâ i ecuilibris de Regjon, saltâts cul vè sdrumât lis provinciis, e che a somein butâ viers Triest?**

Par me, ogni organism istituzionâl al à di fâ il so, e la Assemblee e je nassude cuntun profil di promozion culturâl, sociâl e valorial. Dâi altris compits le snature e i gjave energjiis.

**Par finî, mi disie cualchi particolaritât o event furlan che o vês tal Comun?**

Us invidin ae nestre *Sagre dal Lengal*, ae Madone dal Rosari, e o ricuardi la presince di Cordovât intai scrits di Pasolini e di Ippolito Nievo, la tradizion dai pignarûi epifanics, ducj simbui dal nestri sintiment furlan profund. ■

**FOCUS**  
**Un borc che al à madressût ispirazions poetichis**

**C**ordovât al è stât nomenât pe prime volte intun document intal 1186, dulà che si lu segne tant che possediment concedût di pape Urban III al vescul di Concuardie. Dut câs, il borc antic al è nassût salacor sui rescj di un *castrum* roman.

◆ Al è plen di storie e di monuments preseabii, cuntun cjistiel, un borc medievâl, il santuari marian plui vecjo de diocesi, una plêf antiche che e rimonte al secul XV; al è, e al è stât di ispirazion poetiche par grancj leterâts tant che Ippolito Nievo e Pier Paolo Pasolini.

◆ La storie documentade e scommence inte Ete di Mieç, cu lis vicenda di grues complès agricul che si slargjave dongje dal vât suntu ram antic dal Tiliment. Il passaç al veve dongje una strade impuartante che e colegave Puart ae aree austriache e todescje. I vesculi di Concuardie a àn fortificât il borc tor dal secul XI-XII e a àn sielzût Cordovât tant che cjistiel plui impuartant de planure.

◆ Dopo dal passaç dal Friûl a Vignesie, il cjistiel al à pierdude la sô funzion militar. Intant l'inse diament al prosperave: inte zone de Plêf di Sant Andree e esistev la vile rurâl, dentri des muris si jere disvilupât il borc e a Nord al cresceve il borc gnûf dai marcjadants, dai nodâr, dai parons, ae dai rtesans.

◆ Chesj spazis si àn ampliât una vore dopo che, intal prin Sîscent, al è stât fat sù il Santuari de Madone, dongje dal lûc là che intal 1592 une femine e veve dit di ve viodude la Mari di Diu.

◆ Intal secont deceni dal secul XVIII, ae glesie al è stât metût dongje un convent di paris Domenicans, che chi a restarin fin al 1806.

◆ Dal Dicembar dal 2004 al è tra i "Borcs plui bie di Italie". ■



---

**Par viodi chei altris contignûts  
de “La Patrie dal Friûl”,**

abonaitsi. Dutis lis informazions si cjatin sul sît  
**[www.lapatriedalfriul.org](http://www.lapatriedalfriul.org)**



**Per vedere gli altri contenuti  
de “La Patrie dal Friûl”,**

abbonatevi. Tutte le informazioni si trovano sul sito  
**[www.lapatriedalfriul.org](http://www.lapatriedalfriul.org)**

Che tu sedis za abonât o che tu le vedis lete dome cualchi volte,  
aboniti o rinove l'abonament a un mensîl unic:

**almancul une volte al mês, lei par furlan!**

